

四庫全書

集部

欽定四庫全書

集部

御定全唐詩錄卷三十八

詳校官左中允_臣璿五珠

主事銜_臣徐以坤覆勘

總校官原任中允_臣王燕緒

校對官中書_臣嵇承志

謄錄監生_臣華光楣

權要久之召還宰相欲任南省郎乃作立都觀看
花君子詩當路不喜出為播州易連州徙夔州由
和州刺史入為主客郎中復作遊立都觀詩有兔
葵燕麥之語聞者益薄其行俄分司東都裴度薦
為集賢學士度罷出刺蘇州徙汝同二州會昌時
檢校禮部尚書

禹錫與樂天唱和號劉白唱和集與裴度唱和號
汝洛集與令狐楚唱和號彭陽唱和集與李德裕

唱和號吳蜀集

禹錫晚年與白傅友善詩筆文章時無在其右者
常與禹錫唱和往來因集其詩而叙之曰彭城劉
夢得詩豪者也其鋒森然少敢當者予不量力往
往犯之夫合應者聲同交爭者力敵一往一復欲
罷不能由是每製一篇先於視草視草則興作興
作則文成一二年來日尋筆研同贈和答不覺滋
多太和三年春已前紙墨所存者凡一百三十八

首其餘乘興仗醉率然口號者不在此數因而命
小姪龜兒編勒成兩軸仍寫二本一付龜兒一付
夢得小兒崑郎各令收藏附兩家文集余頃與元
微之唱和頗多或在人口嘗戲微之云僕與足下
二十年來為文友詩敵幸也亦不幸也吟咏情性
播揚名聲其適遺形其樂忘老幸也然江南士女
語才子者多云元白以子之故僕不得獨步於吳
越間此亦不幸也今垂老復過夢得非重不幸耶

夢得曰文之神妙莫先於詩若妙與神則吾豈敢
如夢得雪裏高山頭白早海中仙果子生遲沉舟
側畔千帆過病樹前頭萬木春之類真為神妙
矣在在處處應有靈物護持豈兩家子弟秘藏而
已其為名流許與如此

禹錫嘗對賓友每吟張博士籍詩云藥酒欲開期
好客朝衣暫脫見閒身對花木則吟王右丞詩云
興闌啼鳥換坐久落花多又曰白二十二好余秋

水詠云東屯滄海濶南漾洞庭寬余自知不及韋
蘇州春潮帶雨晚來急野渡無人舟自橫嘗過洞
庭雖為一篇思杜員外落句云年去年來洞庭上
白蘋愁殺白頭人鄙夫之言有愧於杜公也楊茂
卿校書過華山詩云河勢崑崙遠山形菡萏秋此
實為佳句

古體詩

團扇歌

團扇復團扇奉君清暑殿
秋風入庭樹從此不相見
上有乘鸞女蒼蒼網蟲遍
明年入懷袖別是機中練

順陽歌

朝辭官軍驛前望順陽路
野水蓄荒墳秋蟲鏤宮樹
曾聞天寶來塞馬西南驚
城守魯將軍拔城從此去

莫徭歌

莫徭自生長名字無符籍
市易雜鮫人婚姻通木客
星居占泉眼火種開山脊
夜渡千仞谿含沙不能射

插田歌 并序

連州城下俯接村墟偶登郡樓適有所感遂書
其事為俚歌以俟采詩者

岡頭花草齊燕子東西飛田塍望如線白水光參差農
婦白紵裙農夫綠蓑衣齊唱田中歌嚶嚶如竹枝但聞
怨響音不辨俚語詞時時一大笑此必相嘲嗤水平苗
漠漠烟火生墟落黃犬往復還赤鷄鳴且啄路傍誰家
郎烏帽衫袖長自言上計吏年幼離帝鄉田夫語計吏

君家儂定記一來長安道眼大不相覩計吏笑致辭長
安真大處省門高軻我儂入無度數昨來補衛士唯用
筒竹布君看二三年我作官人去

馬嵬行

綠野扶風道黃塵馬嵬驛路邊楊貴人墳高三四尺乃
問里中兒皆言幸蜀時軍家誅佞倖天子捨妖姬羣吏
伏門屏貴人牽帝衣低回轉美目風日為無暉貴人飲
金屑倏忽舜英暮平生服杏丹顏色真如故屬車塵已

遠里巷來窺覷共愛宿妝妍君王畫眉處履綦無復有
文組光未滅不見巖畔人空見凌波襪郵童愛踪跡私
手解鞦結傳看千萬眼縷絕香不歇指環照骨明首飾
敵連城將入咸陽市猶得賈胡驚

壯士行

陰風振寒郊猛虎正咆哮徐行出燒地連吼入黃茅壯
士走馬去鎧前彎玉消叱之使人立一發如鼓交悍睛
忽星墮飛血濺林梢彪炳為我席羶腥充我庖里中欣

害除賀酒紛呶號明日長橋上傾城看斬蛟

拋毬樂詞

五綵繡團圓登君玳瑁筵最宜紅燭下偏趁落花前上
客如先起應須贈一船

春早見花枝朝朝恨發遲及看花落後却憶未開時幸
有拋毬樂一杯君莫辭

養鷲詞

并序

途逢少年志在逐獸方呼鷹隼以襲飛走因縱

觀之卒無所獲行人有常從事於斯者曰夫鷲
禽饑則為用今哺之過篤故也予感之作養鷲

詞

養鷲非玩形所資擊鮮力少年昧其理日夜哺不息探
雛網黃口旦暮有餘食寧知下鞬時翅重飛不得羶
上林表狡兔自南北飲啄既已盈安能勞羽翼

送相陽熊判官孺登府罷歸鍾陵因寄呈江西裴

中丞二十三兄

射策志未就從事歲云除
篋留馬卿賦袖有劉弘書
忽見夏木深悵然憶吾廬
復持州民刺歸謁專城居
君家誠易知勝絕傾里閭
人言北郭生門有卿相輿
鍾陵謁千里帶郭西江水
朱檻照河宮旗亭綠雲裏
前年初缺守鎮簡由宸扆
臨軒弄郡章得人方付此
是時左馮翊天下第一理
貴臣持牙璋優詔發青紙
迎風汚吏免先令疲人喜
何武劾腐儒陳蕃禮高士
昔升君子堂腰下綬猶黃

中丞時為
萬年尉

汾陰有寶氣赤堊多光鋳
束簡下曲

金
卷三十八
臺佩韃來歷陽綺筵陪一笑蘭室襲餘芳風水忽異勢
江湖遽相忘因君倘借問為話老滄浪

送韋秀才道冲赴制舉

驚禽一辭巢棲息無少安秋扇一離手流塵蔽霜紈故
侶不可追涼風日已寒遠逢杜陵士別盡平生歡逐客
無印綬楚江多芷蘭因居時暇遊長缺不復彈閱書南
軒際絙瑟清夜闌萬境身外寂一杯腹中寬伊昔元宗
朝冬卿冠駕鸞肅穆升內殿從容領儒冠游夏無措詞

陽秋垂不刊至今羣玉府學者空縱觀世人希德門揭
若攀峰巒之子向明訓鏘如振琅玕一旦西上書道上
拂征鞍荆臺宿暮雨漢水浮春瀾君門啓天中多士如
星攢煙霞覆雙闕拚舞羅千官清漏滴銅壺仙廚下雕
盤熒煌仰金榜錯落濡飛翰古來才傑士所歎遭時難
一鳴從此始相望青雲端

送李策秀才還湖南因寄幕中親故兼簡衡州李

八郎中

深春風日淨晝長幽鳥鳴僕夫前致詞門有白面生攝
衣相問訊解帶坐南榮端志見眉睫芳言發精誠因出
懷中文調孤詞亦清悄如促柱絃掩抑多不平乃言本
蜀士世降岷山靈前人秉藝文高視來上京曳綬司徒
府所從信國楨析薪委空林善響難繼聲何處翳附郭
幾人思郈成雲天望喬木風水悲流萍前與計吏西始
列貢士名森然就筆札從試春官卿帝城岐路多萬足
俟晨星茫茫風塵中工拙同有營寒女勞夜織山苗榮

寸莖侯門方擊鐘衣褐誰將迎弱羽果摧顏壯心鬱悒
憚諒無蟠木容耶復遂累行昨日訊靈龜絲言利艱貞
當求捨拔中必在審已明誓將息薄遊焦思窮筆精時
蘭在幽渚安得揚芬馨嗟余摧落者散質負華纓一聆
苦辛詞再動伊鬱情身棄言不重愛才心尚驚恨無羊
角風使爾化北溟論罷情益親涉旬忘歸程日攜邑中
客間眺江上城晝渴命金罍宵談轉璿衡蕙風香塵尾
月露濡桃笙忽被戒羸驂薄言事南征火雲蔚千里旅

思浩已盈湘江含碧虛衡嶺浮翠晶豈伊山水異適與
人事并油幙似昆丘粲然疊瑤瓊庾樓見清月孔座多
綠醴復有衡山守本自雲龍庭至和在靈府發越侔咸
英一揮出滎陽惠彼蚩蚩氓隄隄辭灞水居者皆涕零
惟昔與伊人交歡經宿齡一從雲雨散滋我鄙吝萌北
渚不堪愁南音誰復聽離憂若去水浩蕩無時停嘗聞
祝融峯上有神禹銘古石琅玕姿祕文螭虎形聖功奠
遠服神物擁休禎賢人在其下彷彿疑蓬瀛君行厯郡

齋大袂拂雙旌飾容遇朗鑒肝鬲可以呈昔日馬相如
臨卬坐盡傾勉君刷羽翰蚤取凌青冥

偶作

終朝對尊酒嗜興非嗜甘終日偶衆人縱言不縱談世
情閒盡見藥性病多諳寄謝嵇中散予無甚不堪

萬卷堆牀書學者識其真萬里長江水征夫度要津養
生非但藥悟佛不因人燕石何須辨逢時即至珍

讀張曲江集作

并引

世稱張曲江為相建言放臣不宜與善地多徙
五溪不毛之鄉及今讀其文自內職牧始安有
瘴癘之歎自退相守荆門有拘囚之思託諷禽
鳥寄詞草樹鬱然有騷人風嗟夫身出於遐陬
一失意而不能堪矧華人士族而必致醜地然
後快意哉議者以曲江為良臣識祿山有反相
羞凡器與同列密啓廷爭雖古哲人不及而燕
翼無似終為餒魂豈收心失恕懼陰謫最大雖

二美莫贖邪不然何袁公一言明楚獄而鐘鼎
四葉以是相較神可誣乎予讀其文因為此詩
聖言貴忠恕至道重觀身法在何所恨色傷斯為仁良
時難久恃陰譎豈無因寂寞韶陽廟魂歸不見人

謁柱山會禪師

我本山東人平生多感慨弱冠遊咸京上書金馬外結
交當世賢馳聲溢四塞勉修貴及早狙健不知退錙銖
揚芬馨尋尺超瑕類淹留郢南鄙摧頽羽翰碎安能咎

往事且欲去沉痾吾師得真如寄在人寰內哀我墮名
網有如翺飛輩瞳瞳揭智燭照使出昏昧靜見玄闔啓
歎然初心會夙尚一何微今得信可大覺路明證入便
門通懺悔悟理言自忘處屯道猶秦色身豈吾寶慧性
非形礙思此靈山期未卜何年載

武陵觀火詩

楚鄉祝融分炎火常為虞是時直突烟發自晨炊徒盲
風扇其威白晝曛陽烏操縵不暇汲循牆還避踰怒如

列缺光迅與莽輪俱聯延掩四達赫奕成洪鑪洵疑雲
濤翻颯若鬼神趨當前迎焮起是物同膏腴金烏入梵
天赤龍遊玄都騰烟透窻戶飛焰生藥爐火山推半空
星雨灑中衢瑤壇被髹漆寶樹攢珊瑚花縣與琴焦旗
亭無酒濡市人委百貨邑令遺雙鳧餘勢下隈隩長燂
烘舳艫吹熒照水府炙浪愁天吳灾罷雲日晚心驚視
聽殊高灰辨廩庾黑土連闐闐象燼合星羅遊氛爍人
膚厚地藏宿熱遙林呈驟枯火德資生人庸可一日無

御之失其道敲石彌天隅晉庫走龍劍吳宮傷燕雉五
行有沴氣先哲垂訐謨宋鄭同日起時稱賢大夫無苛
自可樂弭患意所圖賢守恤人瘼臨煙駐驪駒弔傷色
慘怛言失詞劬愉下令蠲里布指期輕市租閑垣適未
立苦蓋自相娛山木行剪伐江泥宜瑾塗邑臣不必葺
何用徵越巫

崔元受少府自貶所還遺山薑花以詩答之

故人博羅尉遺我山薑花採從碧海上來自謫仙家雲

濤潤孤根陰火照晨葩靜搖扶桑日豔對瀛洲霞世人
愛芳辛寧擷忘幽遐傳名入帝里飛騎辭天涯王濟本
尚味石崇方鬪奢雕盤多不識綺席乃增華驛馬損筋
骨貴人滋齒牙顧余藜藿士持此重咨嗟

途中早發

馬踏塵上霜月明江頭路行人朝氣銳宿鳥相辭去流
水隔遠邨漫山多紅樹悠悠關塞內往來無間步

和董庶中古散調詞贈尹果毅

替聽東武吟壯年心已悲如何當落聞君辛苦詞言
有窮巷士弱齡頗尚竒讀得玄女符生當事邊時借名
遊俠窟結客幽并兒往來長秋間能帶雙鞵馳崩騰天
寶未塵暗燕南陲燿火入咸陽詔徵神武師是時占軍
幕插羽揚金羈萬夫列棘門觀射中戟支誓言雪國讐
親愛從此辭中宵倚長劍起視蚩尤旗介馬晨蕭蕭陣
雲竟天涯陰風獵白草旗檠光參差勇氣貫中腸視身
忽如遺生擒白馬將敵騎不敢追貴臣上戰功名姓隨

意移終歲肌骨苦他人印纍纍謁者既清宮諸侯各罷
戲上將賜甲第門戟不可窺皆血下沾襟天高問無期
却尋故鄉路孤影空相隨行逢里中舊樸簳昔所嗤一
言合侯王腰佩黃金龜問我何自苦可憐真數奇遲回
顧徒御得色懸雙眉翻然悟世途撫已昧所宜田園已
蕪沒流浪江海湄鷺禽毛翮摧不見翔雲姿衰容蔽逸
氣孑孑無人知寂莫草玄徒長吟下書帷聞君發哀韻
若扣瑤林枝有客識其真潺湲涕交頤勸爾一杯酒陶

然足自怡

遊桃源一百韻

沅江清悠悠連山鬱岑寂回流抱絕巘皎鏡含虛碧昏
旦遞明媚烟嵐分委積香蔓垂綠潭暴龍照孤磧淵明
著前志子驥思遠躋寂寂無何鄉密爾天地隔金行太
元歲漁者偶探步尋花得幽踪窺洞穿闔隙依微聞雞
犬豁達值阡陌居人互相迎笑語如平昔廣樂雖交奏
海禽心不懌揮手一來歸故溪無處覓綿綿五百載市

朝幾遷革有路在壺中無人知地脈皇家感至道聖祚
自天錫金闕傳本枝玉函留寶曆禁山開祕宇復戶潔
靈宅藥檢香氛氲醮壇烟幕幕我來塵外躅瑩若朝醒
析崖轉對翠屏水窮留畫鷁三休俯喬木千級扳峭壁
旭日聞撞鐘綵雲迎躡屐遂登最高頂縱目還楚澤平
湖見草青遠岫連霞赤幽尋如夢想縣思屬空閭黃綠
且忘疲耽玩近成癖清猿伺曉發瑤草凌寒折祥禽舞
蔥籠珠樹搖玃璫羽人顧我笑勸我稅歸輒霓裳何飄

鬪童顏潔白，暫重巖。是藩屏，馴鹿受羈勒。樓居邇清霄。
蘿萋成翠帶，仙翁遺竹杖。王母留桃核，姹女飛丹砂。青
童護金液，寶氣浮鼎耳。神光生劍脊，虛無天樂來。窻窳
鬼兵役，丹丘肅朝禮。玉札工紬繹，枕中淮南方。牀下阜
知烏明鐙，坐遙夜幽籟。聽浙漉，因話近世仙。聳然心神
惕，乃言瞿氏子。骨狀非凡格，往事黃先生。羣兒多侮劇，
誓然不屑意。元氣貯肝膈，往往游不歸。洞中觀博奕，言
高未易信。猶復加訶責，一旦前致辭。自云仙期迫，言師

有道骨前事常被謫如今三山上名字在真籍悠然謝
主人後歲當來覲言畢依庭宇如煙去無迹觀者皆失
次驚追紛絡繹日暮山徑窮松風自蕭槭適逢修蛇見
瞋目光激射如嚴三清居不使恣搜索唯餘步綱勢八
趾在沙礫至今東北隅表以壇上石列仙徒有名世人
非目擊如何處庶際白日振羽翮洞天豈幽遠得道如
咫尺一氣無死生三光自遷易因思人間世前路何狹
窄瞥然此生中善祝期滿百大方播羣類秀氣肖翕闢

性靜本同和物牽成阻阨是非闢方寸葷血昏精魄遂
令多天傷猶喜見斑白喧喧車馬馳苒苒桑榆夕共安
緹繡榮不悟泥途適紛吾本孤賤世業在縫掖九流宗
指歸百氏旁櫛撫公卿偶慰薦鄉曲繆推擇居安白社
貧志傲玄纁辟功名希自取簪組自揚歷書府蚤懷鉛
射宮曾發的起草香生帳坐曹烏集柏賜燕聆簫韶侍
祠閱琮璧嘗聞履忠信可以行蠻貊自述希古心忘恃
干時畫巧言忽成錦苦志徒食檠平地生峯巒深心有

矛戟層波一震盪弱植忽淪溺北渚弔靈均長岑思亭
伯禍來昧幾非事去空歎息塵累與時深流年隨漏滴
才能疑木鴈報施迷夷跼楚奏紮鍾儀商歌勞窳戚稟
生非懸解對境方感激自從嬰網羅每事問龜策王正
降雷雨環玦賜遷斥儻復夷平人誓將衣羽客買山構
精舍領徒開講席冀無身外憂自有閒中益道芽期日
就塵慮乃水釋且欲遺姓名安能慕竹帛長生尚學致
一漑豈虛擲芝朮資餼糧烟霞拂巾幘黃石履看墮洪

崖肩可拍聊復嗟
蜉蝣何煩哀
虺蜴青囊既深味
瓊葩亦屢摘
縱無西山姿
猶免長戚戚

客有為余話登天壇過雨之狀因以賦之

清晨登天壇
半路逢陰晦
疾行穿雨過
却立視雲背
白日照其上
風雷走於內
滉漾雪海翻
槎牙玉山碎
蛟龍露鬚鬣
神鬼含變態
萬狀互生滅
百音以繁會
俯觀羣動靜
始覺天宇大
山頂自晶明
人間已濤霈
豁然重昏歛
渙若春冰潰
反照入松門
瀑流飛縞帶
遙光泛物色

餘韻吟天籟洞府撞仙鐘
村墟起夕靄却見山下侶已
如迷世代問我何處來
我來雲雨外

有僧言羅浮寺因為詩以寫之

君言羅浮上容易見九垓
漸高元氣壯洶湧來翼身夜
宿最高峯瞻望浩無鄰
海黑天宇曠星辰來逼人是時
當拙魄陰物恣騰振日光吐
鯨背劍影開龍鱗倏若萬
馬馳旌旗聳齣淪又如廣
樂奏金石含悲辛疑其有巨
靈怪物盡來賓陰陽迭用事
乃俾夜作晨咿喔天雞鳴

扶桑色昕昕赤波千萬里湧出黃金輪下視生物息霏
如隙中塵醯雞仰甕口亦謂雲漢津世人信耳目方寸
度大鈞安知視聽外怪愕不可陳悠悠想大方此乃栝
水濱知小天地大安能識其真

裴祭酒尚書見示春歸城南青松塢別墅寄王左

丞高侍郎之什命同作

早宦閱人事晚懷生道機時從學省出獨望郊園歸野
杓渡春水山花映巖扉石頭解金章林下步綠薇青松

鬱成塢修竹盈尺圍吟風起天籟蔽日無炎威危徑盤
羊腸連甍聳翬飛幽谷響樵斧澄潭環釣磯因高見帝
城冠蓋揚光輝白雪難持寄清韻投所希二公如鳳雛
比翼翔太微含情謝林壑酬贈駢珠璣顧余久即潛愁
寂對芳菲一聞丘中趣再撫黃金徽

重至衡陽傷柳儀曹

并序

元和乙未歲與故人柳子厚臨湘水為別柳浮
舟適柳州余登陸赴連州後五年余從故道出

桂嶺至前別處而君沒於南中因賦詩以投弔
憶昨與故人湘江岸頭別我馬映林嘶君颿轉山滅馬
嘶循故道颿滅如流電千里江離春故人今不見

月夜憶樂天兼寄微之

今宵帝城月一望雪相似遙想洛陽城清光正如此知
君當此夕亦望鏡湖水展轉相憶心月明千萬里

韓十八侍御見示岳陽樓別竇司直詩因令屬和
重以自述故足成六十二韻

楚江何蒼然層瀾七百里孤城寄遠目一瀉無窮已蕩
漾浮天蓋四環宣地理積漲在三秋混成非一水冬遊
見清淺春望多洲汜雲錦遠沙明風烟青草靡火星忽
南見月峽方東迤雪波西山來隱若長城起獨專朝宗
路駛悍不可止支川讓其威蓄縮至南委熊武走蠻落
熊武二
漢名瀟湘來與郢炎蒸動泉源積潦搜山趾歸往無
旦夕包含通遠邇行當白露時眇視秋光裏曙色未昭
晰露華遙斐亶浩耳神骨清如觀混元始北風忽震盪

驚浪迷津溪怒激鼓鏗旬感成山歸碗鷓鴣疑變化罔
象何恢詭噓吸寫樓臺騰驤露鬢尾景移羣動息波靜
繁音弭明月出中央青天絕纖滓素光淡無際綠靜平
如砥空影渡鷓鴣秋聲思蘆葦鮫人弄機杼貝闕駢紅
紫珠蛤吐玲瓏文鯨翔旖旎水鄉吳蜀限地勢東南庠
軫翼梁垂精衡巫屹環峙名雄七澤數國辨三苗氏唐
羿斷修蛇荆王憚青兕秦狩跡猶在虞巡路從此軒后
奏宮商騷人咏蘭芷茅嶺潛相應橘洲傍可指郭璞驗

幽經羅含著前紀觀津戚里族按道侯家子聯袂登高

樓臨軒笑相視假守亦高卧

實時權領郡事

墨曹正垂耳

韓亦量移

江陵法曹

契濶話涼温壺觴慰遷徙地偏山水秀客重杯盤

侈紅袖花欲燃銀燈晝相似興含更抵掌樂極同啓齒
筆鋒不能休藻思一何綺伊余負微尚夙昔慚知己出

入金馬門交結青雲士襲芳踐蘭室學古遊槐市策慕
宋前軍文師漢中壘陋容昧俯仰孤志無依倚衛足不
如葵漏川空欲蟻幸逢萬物泰獨處窮途否鍛翮重疊

傷兢魂再三褫遠瑗亦屢化左丘猶有耻桃源訪仙宮
薜服祠山鬼故人南臺舊一别如弦矢今朝會荆蠻斗
酒相宴喜危途出新什笑忤隨伸紙絢若觀五色歡然
臻四美委曲風濤事分明窮達旨洪韻發華鐘淒音激
清微羊濬要平聲共和江淹多雜擬徒欲仰高山焉能追
逸軌湘洲路四達巴陵城百雉何必顏光祿留詩張內
史

和郴州楊侍郎翫郡齋紫薇花十四韻

幾年丹霄上出入金華省
覽別萬年枝看花桂陽嶺南
方足奇樹公府成佳境
綠陰交廣除明豔透蕭屏
雨餘人吏散燕語簾櫳靜
懿此含曉芳脩然忘簿領
紫茸垂組縷金樓攢鋒穎
露溥暗傳香風輕徐就影
萼弱多意思從容占光景
得地在侯家移根近仙井
開樽好凝睇倚瑟仍回頭
遊蜂駐綵冠舞鶴迷烟頂
興生紅藥後愛與甘棠並
不學夫桃姿浮榮在俄頃

有懶吟

有獺得嘉魚自謂天見憐先祭不敢食捧鱗望清玄人
立寒沙上心專脰著肩漁翁以為妖舉塊投其前呼兒
貫魚歸與獺同烹煎關關黃金鷄大翅搖江煙下見盈
尋魚投身擘洪漣攫拏隱鱗去哺雛林嶽巔鷓鴣欲向
隙遙探莫敢前長居青雲路彈射無由緣何地無江湖
何水無鮪鱸天意不宰割菲祭徒虔虔空餘知禮重載
在淹中篇

虎丘寺路宴

青林虎丘寺林際翠微路立見山僧來遙從鳥飛處茲
峯淪寶玉千載惟丘墓埋劍人空傳鑿山龍已去捫蘿
披翳蒼路轉夕陰遽虎嘯崖谷寒猿鳴松杉暮徘徊北
樓上江海窮一顧日映千里帆鷗歸萬家樹斲因愜所
適果得捐外慮庭暗棲還雲簷香滴甘露久迷空寂理
多為聲華故永欲投此山餘生豈能誤

九華山

并序

九華山在池州青陽縣西南九峯競秀神采奇

異昔予仰太華以為此外無奇愛女儿荆山以
為此外無秀及今登九華始悼前言之容易也
惜其地偏且遠不為世所稱故歌以大之

奇峰一見驚魂魄意想洪鑪始開闢疑是九龍天矯欲
攀天忽逢霹靂一聲化為石不然何至今悠悠億萬年
氣勢不死如騰公

音騫輕
舉貌

雲含幽兮月添冷日月凝輝

兮江漾影結根不得要路津迴秀長在無人境軒皇封
禪登云亭大禹會計臨東溟乘標

力最反
山行具

不來廣樂絕

獨與猿鳥愁青瑩君不見敬亭之山廣索漠兀如斷岸
無稜角宣城謝公一首詩遂使聲名齊五岳九華山九
華山自是造化一尤物焉能籍甚乎人間

秦娘歌

并引

秦娘本韋尚書家工謳者初尚書為吳郡得之
命樂工誨之琵琶使之歌且舞無幾何盡得其
術居一二歲攜之以歸京師京師多新聲善工
於是又捐去故技以新聲度曲教之又盡其妙

而秦娘名字往往見稱於貴遊之間元和初尚書薨于東京秦娘出居民間久之為蘄州刺史張繇所得其後繇坐事謫居武陵郡繇卒秦娘無所歸地荒且遠無有能知其容與藝者故日抱樂器而哭其音嗁殺以悲雒客聞之為歌其事以足於樂府云

秦娘家本閭門西門前綠水環金隄有時妝成好天氣走上牽橋折花戲風流太守韋尚書路傍忽見停隼旌

斗量明珠烏傳意，紺幘迎入專城居。長髮如雲衣似霧，
錦茵羅薦承輕步。舞學驚鴻水榭春，歌撩上客蘭堂暮。
從郎西入帝城中，貴遊簪組香簾櫳。低鬟緩視抱明月，
纖指破撥生胡風。繁華一旦有消歇，題劍無光履聲絕。
洛陽舊宅生草萊，杜陵蕭蕭松柏哀。妝奩蟲網厚如繭，
博山爐側傾寒灰。蘄州刺史張公子，白馬新到銅駝里。
自言買笑擲黃金，月墜雲收從此始。始安知鵬鳥座隅飛，
寂寞旅魂招不歸。秦嘉鏡有前時結，韓壽香銷故篋衣。

山城少人江水碧
斷雁哀猿風雨夕
朱絃已絕為知音
雲鬢未秋私自惜
舉目風煙非舊時
夢尋歸路多參差
如何將此千行淚
更灑湘江斑竹枝

龍陽縣歌

縣門白日無塵土
百姓縣前挽魚罟
主人引客登大隄
小兒縱觀黃犬怒
鷓鴣驚鳴繞籬落
橘柚垂芬照窓戶
沙平草綠見吏稀
寂寞斜陽照懸鼓

沓潮歌

并引

元和十年夏五月終風駕濤南海羨溢南人曰
沓潮也率三更歲一有之余為連州客或為余
言其狀因歌之附於南越志

屯門積日無回飈滄波不歸成沓潮轟如鞭石斫且搖
虛空欲駕鼉鼉橋驚湍蹙縮悍而驕大陵高岸失岑巖
四邊無阻音響調背負元氣掀重霄介鯨得性方逍遙
仰鼻噓吸揚朱翹海人狂顧迭相招罰衣髻首聲曉曉
征南將軍登麗譙赤旗指揮不敢囂翼日風回沴氣消

歸濤納納景昭昭烏泥白沙復滿海海色不動如青瑤

白鷺兒

白鷺兒最高格毛衣新成雪不敵衆禽喧呼獨凝寂孤
眠芊芊草久立潺潺石前山正無雲飛去入遙碧

送裴處士應制舉

并引

晉人裴昌禹讀書數千卷於周官小戴禮尤邃
性是古敢言雖王侯不能卑下故與世相參差
凡抵有位以索合行天下幾遍常歎諸侯莫可

遊欲一見天子而未有路會今年詔書徵賢良
昌禹大喜以為盡可以豁平生搏髀爵躍曰一
觀雲龍庭足矣由是裹三月糧而西徂余以七
言為西遊之資藉耳

裴生久在風塵裏氣勁言高少知己注書曾學鄭司農
歷國多於孔夫子往年訪我到連州無窮絕境終日遊
登山雨中試蠟屐入洞夏裏披貂裘白帝城邊又相遇
飲翼三年不飛去忽然結束如秋蓬自稱對策明光宮

人言策中說何事掉頭不答看飛鴻彤庭翠松迎曉日
鳳啣金榜雲間出中貴腰鞭立傾酒宰臣委佩觀搖筆
古稱射策如彎弧一發偶中何時無由來草澤無忌諱
努力滿挽當身衝憶得當年識君處嘉禾驛後聯檣住
垂釣釣得王餘魚踏芳共登蘇小墓此事合同夢想間
相看一笑且開顏老夫希逢舊隣里為君扶病到方山

送僧仲剏東遊兼寄呈靈澈上人

釋子道高神氣閒住持曾上清涼山晴空禮拜見真像

金毛玉髻卿雲間西遊長安隸僧籍本寺門前曲江碧
松間白月照寶書竹下香泉灑瑤席前時學得經論成
奔馳象馬開禪局高筵談柄一麾拂講下聽徒如醉醒
舊聞南方多禪老次第來入荆門道荆州本自重彌天
南朝塔廟猶依然宴坐東陽枯樹下經行居止故臺邊
忽憶遺民社中客為我衡陽駐飛錫講罷同尋相鶴經
閒來共蠟登山屐一旦揚眉望沃洲自言王謝許同遊
憑將雜擬三十首寄與江南湯惠休

觀碁歌送僕師西遊

長沙男子東林師閒讀藝經工奕碁有時凝思如入定
暗覆一局誰能知今年訪余來小桂方袍袖中貯新勢
山城無事愁日長白晝懵懵眠匡牀因君臨局看鬪智
不覺遶景沉西墻自從山人過樵子直到開元王長史
前身後身付餘習百變千化無窮已初疑磊落曙天星
次見搏擊三秋兵雁行布陣衆未曉虎穴得子人皆驚
行盡三湘不逢敵終日饒人損機格自言臺閣有知音

悠然遠起西遊心
高山夏木陰寂寂
好處徘徊駐飛錫
忽思爭道畫平沙
獨笑無言心有適
藹藹京城在九天
貴游豪士足華筵
此時一行出人意
賭取聲名不要錢

送鴻舉師遊江西

并引

始予謫朗州爾時是師振麻衣斐然而前持文
篇以為僧贄唧唧而清如蟲吟秋自然之響無
有假合有足佳者故為賦二章以聲之距今年
過於建平赤髭益蕃文思益深而內外學益富

既訊已探祕中出前所與詩閱之紙勞墨瘁與
我同來因思夫苒苒之光渾渾之輪時而言有
初中後之分日而言有今昨明之稱身而言有
幼壯艾之期乃至一磬欬一彈指中際皆具何
必求三生以異身耶然而視予之文者昔與今
有莛楹之別視予之書昔與今有鈞石之懸視
予之仕昔與今有唯阿之差耳豈有工拙之數
存乎其間哉蓋可勉而進者與日月而至矣彼

儻來外物雖日月無能至焉是歲師告予遊江
西復為賦七言以為遊地耳

禪客學禪兼學文出山初似無心雲從風卷舒來何處
繚繞巴山不得去山川古寺好閒居讀盡龍王宮裏書
使君灘頭揀石硯白帝城邊尋野蔬忽然登高心瞥起
又欲浮杯信流水烟波浩淼魚鳥情東去三千三百里
荆門峽斷無盤渦湘平漢濶清光多廬山霧開見瀑布
西江月淨聞漁歌鍾陵八郡多名守半是西方社中友

與師相見便談空想得高齋獅子吼

三鄉驛樓伏覩玄宗望女几山詩小臣斐然有感

開元天子萬事足唯惜當時光景促三鄉陌上望仙山
歸作霓裳羽衣曲仙心從此在瑤池三清八境相追隨

天上忽乘白雲去世間空有秋風詞

沈存中曰禹錫霓裳羽衣曲云三鄉

陌上望仙山歸作霓裳羽衣曲又王建詩云聽風聽水作霓裳樂天詩注云開元中西涼府節度使楊敬述造鄭岵津陽門詩注云葉法善嘗引上入月宮聞仙樂及上歸但記其半遂于笛中寫之會西涼府都督楊敬述進婆羅門曲與聲調相符遂以月中所聞為散序用敬述所進為其腔而名霓裳羽衣曲說各不同今蒲州道

遙樓楣上有唐人橫書類梵字相傳是霓裳謠字訓不通莫知是非或謂今燕都有獻仙音曲乃其遺聲然霓裳本謂之道調法曲今獻仙音乃小石調耳未知孰是

武昌老人說笛歌

武昌老人七十餘手把庾令相問書自言少小學吹笛
早事曹王曾賞激往年鎮戍到蘄州楚山蕭蕭笛竹秋
當時買材恣搜索典却身上烏貂裘古苔蒼蒼封老節
石上孤生飽風雪商聲五音隨指發水中龍應行雲絕
曾將黃鶴樓上吹一聲占盡秋江月如今老去語尤遲

音韻高低耳不知氣力已微心尚在時時一曲夢中吹

西山蘭若試茶歌

山僧後簷茶數叢春來映竹抽新茸宛然為客振衣起
自傍芳叢摘鷹觜斯須炒成滿室香便酌砌下金沙水
驟雨松聲入鼎來白雲滿盃花徘徊悠揚噴鼻宿醒散
清峭徹骨煩襟開陽崖陰嶺各殊氣未若竹下莓苔地
炎帝雖嘗未解煎桐君有錄那知味新芽連拳半未舒
自摘至煎俄頃餘木蘭霑露香微似瑤草臨波色不如

僧言靈味宜幽寂采采翹英為嘉客不辭緘封寄郡齋
甑井銅爐損標格何況蒙山顧渚春白泥赤印走風塵
欲知花乳清冷味須是眠雲跂石人

平蔡州三首

九衢車馬渾渾流使臣來獻淮西囚四夷聞風失匕箸
天子受賀登高樓妖童擢髮不足數血污城西一杯土
南風無火楚澤閒夜行不鎖穆陵關策勳禮畢天下泰

猛士按劍看常山

時惟常山不庭

蔡州城中衆心死妖星夜落照壕水漢家飛將下天來
馬箠一揮門洞開賊徒奔騰望旗拜有若羣蟄驚春雷
狂童面縛登檻車太白天矯垂捷書相公從容來鎮撫
常侍郊迎負文弩西人歸業閭里閒小兒跳跟健兒舞
汝南晨雞喔喔鳴城頭鼓角音和平路傍老人憶舊事
相與感激皆涕零老人收泣前致辭官軍入城人不知

忽驚元和十二載喜見天寶承平時

紀事云夢得曰柳八馭韓十八平淮

西碑云左餐右粥何如我平淮西雅云仰父俯子韓碑兼有帽子使我為之使說用兵伐叛矣韓碑柳雅各有

所長余詩有云城中晨雞啞啞鳴城中鼓角聲和平美
愬之入蔡城也須臾之間賊無覺者又落句云忽驚元
和十二載重見天寶昇
平時以見平淮之年云

聚蚊謠

沉沉夏夜蘭臺開
飛蚊伺暗聲如雷
嘈然歛起初駭聽
殷殷若自南山來
喧騰鼓舞喜昏黑
昧者不分聰者惑
露花滴瀝月上天
利嘴迎人着不得
我軀七尺爾如芒
我孤爾衆能我傷
天生有時不可遏
為爾設幄潛匡牀
清商一來秋日曉
羞爾微形飼丹鳥

百舌吟

曉星寥落春雲低初聞百舌間闕啼花樹滿空迷處所
搖動繁英墜紅雨笙簧百轉音韻多黃鸝吞聲燕無語
東方朝日遲遲升迎風弄影如自矜數聲不盡又飛去
何許相逢綠楊路綿蠻宛轉似娛人一心百舌何紛紛
醜顏俠少停歌聽墜珥妖姬和睡聞可憐光景何時盡
誰能低回避鷹隼廷尉張羅自不闕潘郎挾彈無情損
天生羽族爾何微舌端萬變乘春暉南方朱鳥一朝見

索莫無言萬下飛

飛鳶操

鳶飛杳杳青雲裏
鳶鳴蕭蕭風四起
旗尾飄揚勢漸高
箭頭剡聲相似
長空悠悠霽日懸
六翮不動凝風煙
遊鷗翔雁出其下
慶雲清景相回旋
忽聞饑鳥一噪聚
瞥下雲中爭腐鼠
騰音礪吻相喧呼
仰天大嚇疑鷓鴣
畏人避夫投高處
俛吻無聲猶屢顧
青鳥自愛玉山禾
仙禽徒貴華亭露
樸檄危巢向暮時
毳毼飽腹蹲枯枝

遊童挾彈一麾肘臆碎羽分人不悲天生衆禽各有類
威鳳文章在仁義鷹隼儀形螻蟻心雖能戾天何足貴

秋螢引

漢陵秦苑遙蒼蒼陳根腐葉秋螢光夜空寂寥金氣淨
千門九陌飛悠揚紛綸暉映互明滅金爐星噴銜花發
露華洗濯清風吹低昂不定招搖垂高麗杲暎照珠網
斜歷璇題舞羅幌曝衣樓上拂香帚承露臺前轉仙掌
槐市諸生夜讀書北窓分明辨魯魚行子東山起征思

郎中騎省悲秋氣銅雀人歸自入簾長門帳開來照淚
誰言向晦常自明兒童走步嬌女爭天生有光非自銜
遠近低昂暗中見撮蚊妖鳥亦夜起翅如車輪而已矣

傷秦姝行

并引

河南房開士前為虞部郎中為余言曰我得善
箏人於長安懷遠里其後開士為赤縣牧容州
求國工而誨之藝工而天今年開士遺余新詩
有悼佳人之句顧余知所自也惜其有良技獲

所從而不可久乃為傷詞以貽閒士

長安二月花滿城插花女兒彈銀箏南宮仙郎下朝晚
回頭駐馬聞新聲馬蹄遲遲心蕩漾高樓已遠猶頻望
此時意重千金輕烏傳消息紺輪迎芳筵銀燭一相見
淺笑低鬟初目成蜀絃錚鏦指如玉皇帝弟子韋家曲
青牛文梓赤金簧玫瑰寶柱秋雁行歛蛾妝袂凝清光
抽絃緩調怨且長八鸞鏘鏘渡銀漢九雛威鳳鳴朝陽
曲終韻盡意不足情思悄絕愁空堂從郎鎮南別城闌

樓船里曲瀟湘月馮夷踰躑舞綠波鮫人出聽停綃梭
北池含烟瑤草短萬松亭下清風滿秦聲一曲此時聞
嶺泉嗚咽腸堪斷來自長陵小市東葦華零落瘴江風
侍兒掩泣收銀甲鸚鵡不言愁玉籠博山爐中香自滅
鏡奩塵暗同心結從此東山非昔遊長嗟人與絃俱絕

採菱行

并引

武陵俗事採菱歲秋矣有女郎盛遊於馬湖薄
言採之歸以御客古有採菱曲傳其詞故賦之

以俟採詩者

白馬湖平秋日光紫菱如錦綵駕翔蕩舟遊女滿中央
採菱不顧馬上郎爭多逐勝紛相向時轉蘭橈破輕浪
長鬟弱袂動參差釵影釧文浮蕩漾笑語哇咬顧晚暉
蓼花綠岸扣舷歸歸來共到市橋步野蔓繫船萍滿衣
家家竹樓臨廣陌下有連檣多估客攜觴薦菱夜經過
醉踏大隄相應歌屈平祠下沅江水月照寒波白煙起
一曲南音此地聞長安北望三千里

憶春草

憶春草處處多情洛陽道
金谷園中見日遲
銅駝陌上迎風早
河南大尹頻出難
只將池塘十步看
府門閉後滿街月
幾處遊人草頭歇
館娃宮外姑蘇臺
鬱鬱芊芊撥不開
無風自偃君知否
西子裙裾曾拂來

樂天寄憶舊遊因作報白君以答

報白君別來歲度江南春
江南春色何處好
燕子雙飛故宮道
春城三百七十橋
夾岬朱樓隔柳條
了頭小兒

蕩畫槩長袂女郎簪翠翹郡齋北軒卷羅幕碧池逶迤
繞畫閣池邊綠竹桃李花花下舞筵鋪錦霞吳娃足情
言語黠越客有酒巾冠斜坐中皆言白太守不負風光
向杯酒酒酣襞箋飛逸韻至今傳在人人口報白君相
思空望嵩丘雲其奈錢塘蘇小小憶君淚點石榴裙白君

在城近自
洛歸錢塘

唐侍郎寄遊道林嶽麓二寺詩并沈中丞姚員外

所和見徵繼作

湘西古刹雙蹲蹲羣峰朝拱如駿奔青松步障深五里
龍宮閭闔神為閭高殿呀然壓蒼巘俯瞰長江疑欲吞
橘洲泛浮金寶動水郭繚繞朱樓騫語餘百響入天籟
衆奇引步輕翩翻泉清石布似棋子羅密鳥韻如簧言
迴廊架險高且曲新徑穿林明復昏淺流忽濁山獸過
古木半空天火痕星使雙飛出禁垣元侯餞之遊石門
紫髯翼從紅袖舞竹風松雪香溫磨遠持青瑣照巫峽
一戛驚斷三聲猿靈山會中身不預吟想峭絕愁精魂

恨無黃金千萬餅布地買取為丘園

和牛相公南溪醉歌見寄

脫屣將相守冲謙唯於山水獨不廉枕伊背洛得勝地
鳴臯少室來軒簷相形面勢默指畫言下變化隨顧瞻
清池曲榭人所致野趣幽芳天與添有時轉入潭島間
珍木如幄藤為簾忽然便有江湖思沙礫平淺草纖纖
怪石釣出大湖底珠樹移自天台尖崇蘭迎風綠泛艷
拆蓮含露紅濂襜修廊架空遠岫入弱柳覆檻流波霑

渚蒲抽芽劍脊動岸荻迸笋錐頭銛攜觴命侶極永日
此會雖數心無厭人皆置莊身不到富貴難與逍遙兼
唯君出處得自在決就放曠辭炎炎座賓盡歡恣談謔
愧我掉頭還奮髯能令商於多病客亦覺自適非沈潛

吐綬鳥詞

并序

滑州牧尚書李公以吐綬鳥詞見示兼命繼聲
蓋尚書前為御史時所作有翰林二學士同賦
之今所謂追和也鳥之所異具於首篇

越山有鳥翔寥廓，嗟中天綬光若若。越人偶見而竒之，因名吐綬。江南知四明天姥神仙地，朱鳥星精鍾異氣。赤玉彫成彪炳毛，紅綃剪出玲瓏翅。湖煙始開山日高，迎風吐綬盤花條。臨波似染瑯琊草，映葉疑開阿母桃。花紅草綠人間事，未若靈禽自然貴。鶴吐明珠暫報恩，鵲銜金印空為瑞。春和秋霽野花開，翫景尋芳處處來。翠幕雕籠非所慕，珠丸柘彈莫相猜。棲月啼煙凌縹緲，高林先見金霞曉。三山仙路寄遙情，刷羽揚翹欲上征。

不學碧雞依井絡，願隨青鳥向層城。
太液池中有黃鵠，憐君長在花枝宿。
如何一借羊角風，來聽簫韶九成曲。


城西行

城西簇簇三叛族，叛者為誰蔡吳蜀。
中使提刀出禁來，九衢車馬轟如雷。
臨行與酒杯未覆，讎家白官先請肉。
守吏能然董卓臍，饑烏來覘桓元目。
城西人散秦街平，雨洗血痕春草生。

平齊行二首

烽塵昔起薊北門河南地屬平盧軍貂裘代馬繞東嶽
嶧陽孤桐削為角地形十二虜意驕恩澤含容歷四朝
魯人皆解帶弓箭齊人不復聞簫韶今朝天子聖神武
手握玄符平九土初哀狂童襲故事文告不來方震怒
去秋詔下誅東平官軍四合猶嬰城春來羣鳥噪且驚
氣如壞山墮其庭牙門大將有劉生夜半射落欃槍星
帳中虜血流滿地門外三軍撫連臂驛騎函首過黃河
城中無賊天氣和朝廷侍郎來慰撫耕夫滿野行人歌

泰山沈寇六十年旅祭不享生愁烟今逢聖君欲封禪
神使陰兵來助戰妖氛掃盡河水清日觀杲杲慶雲見
開元皇帝東封時百神受職爭奔馳千鈞猛蘆順流下
洪波涵淡浮熊羆侍臣燕公秉文筆玉簡告天無愧詞
當今睿孫承聖祖岳神望幸河宗舞青門大道屬車塵
共侍歲筵翠華舉



御定全唐詩錄卷三十八

欽定四庫全書

御定全唐詩錄卷

集部

十九

詳校官在中允_臣 瑋五珠

主事銜_臣 徐以坤覆勘

總校官原任中允_臣 王燕緒

校對官中書_臣 嵇承志

謄錄監生_臣 華光楫

欽定四庫全書

御定全唐詩錄卷三十九

劉禹錫

近體詩

奉送家兄歸王屋山隱居

道書王屋山
一名陽洛山

陽洛天壇上依稀似玉京
夜分先見日天淨遠聞笙雲
路將雞犬丹臺有姓名
古來成道者兄弟亦同行

送趙中丞自司金外郎轉官參山南令狐僕射幕

府

趙氏弟兄皆
僕射門客

綠樹滿褒斜西南蜀路賒
驛門臨白草縣道入黃花
相府開油幕門生逐絳紗
行看布政後還從到京華

送羅處士歸嵩山別業

世業嵩山隱雲深無四隣
藥爐燒姹女酒甕貯賢人
曉日華陰霧秋風函谷塵
送君從此去鈴閣少談賓

送元曉上人歸稽亭

重疊稽亭路山僧歸獨行
遠峯斜日影本寺舊鐘聲
徒

侶問新事烟雲愴別情應誇乞食處踏遍鳳凰城

贈別君素上人

窮巷唯秋草高僧獨扣門相歡如舊識問法到無言水
為風生浪珠非塵可昏去來皆是道此別不銷魂

秋日過鴻舉法師寺院便送歸江陵

看畫長廊遍尋僧一徑幽小池兼鶴淨古木帶蟬秋客
至茶烟起禽歸講席收浮杯明日去相望水悠悠

蜀先主廟

漢末謠黃牛白
腹五銖當復

天地英雄氣千秋尚凜然勢分三足鼎業復五銖錢得
相能開國生兒不象賢淒涼蜀故妓來舞魏宮前

觀八陣圖

軒皇傳上畧蜀相運神機水落龍蛇出沙平鵝鶴飛波
濤無動勢鱗介避餘威會有知兵者臨岐指是非

秋日送客至潛水驛

候吏立沙際田家連竹溪楓林社日鼓茅屋午時雞鵲
噪晚禾地蝶飛秋草畦驛樓宮樹近疲馬再三嘶

城東閒遊

借問池臺主多居要路津
千金買絕境永日屬閒人
竹
逕縈紆入花林委曲巡
斜陽衆客散空鎖一園春

新秋對月寄樂天

月露發光彩此時方見秋
夜涼金氣應天靜火星流
蛩
響偏依井螢飛直過樓
相知盡白首清景復追遊

再經故元九相公宅池上作

故池春又至一到一傷情
雁鷺羣猶下蛙螟衣已生
竹

叢身後長臺勢雨來傾六尺孤安在人間未有名

鶴嘆 并序

友人白樂天去年罷吳郡挈雙鶴雛以歸余相
遇於揚子津閒翫終日翔舞調態一符相書信
華亭之尤物也今年春樂天為秘書監不以鶴
隨置之洛陽第一旦予入門問訊其家人鶴軒
然來睨如記相識徘徊俛仰似含情顧慕填膺
而不能言者因作鶴歎以贈樂天

寂寞一雙鶴主人在西京故巢吳苑樹深院洛陽城徐
引竹間步遠含雲外情誰憐好風月隣舍夜吹笙

東隣
即王

家

丹頂宜承日霜翎不染泥愛池能久立看月未成棲一
院春草長三山歸路迷主人朝謁早貪養汝南雞

和樂天蚤寒

雨引苔侵壁風驅葉擁堦久留閒客話宿請老僧齋酒
甕新陳接書籤次第排脩然自有處搖落不傷懷

同樂天和微之深春二十首

同用家花
車斜四韻

何處深春好春深萬乘家宮門皆映柳輦路盡穿花池
色連天漢城形象帝車旌旗暖風裏獵獵向西斜

何處深春好春深阿母家瑤池長不夜珠樹正開花橋
峻通星渚樓暄近日車層城十二闕相對日西斜

何處深春好春深執政家恩光貪捧日貴重不看花玉
饌堂交印沙堤柱礙車多門一已閉直道更無斜

何處深春好春深貴戚家樾嘶無價馬庭發有名花欲

進宮人食先薰命婦車晚歸長帶酒冠蓋甚傾斜

何處深春好春深大鎮家前旌光照日後騎感成花節
院收衙隊毬場簇看車廣筵歌舞散書號夕陽斜

何處深春好春深恩澤家爐添龍腦炷綬結虎頭花賓
客珠成履嬰孩錦縛車畫堂簾幕外來去燕飛斜

何處深春好春深京兆家人眉新柳葉馬色醉桃花盜
息無鳴鼓朝回自走車能令帝城外不敢逕由斜

何處深春好春深刺史家夜闌猶命樂雨甚亦尋花傲

客多憑酒新，姬苦上車公。門吏散後風，擺戟衣斜。

何處深春好，春深羽客家。芝田繞舍色，杏樹滿山花。雲
是淮王宅，風為列子車。古壇操簡處，一徑入林斜。

何處深春好，春深小隱家。芟庭留野菜，撼樹去狂花。醉
酒一千日，貯書三十車。推衾從露體，不敢有餘斜。

何處深春好，春深富室家。唯多貯金帛，不擬負鶯花。國
樂呼聯轡，行厨載滿車。歸來看理曲，燈下寶釵斜。

何處深春好，春深豪士家。多沽味濃酒，貴買色深花。已

臂鷹隨馬連催妓上車城南踏青處邨落逐原斜

何處深春好春深貴胄家迎呼偏熟客揀選最多花飲
饌開華幄笙歌出鈿車興酣罇易罄連瀉酒瓶斜

何處深春好春深唱第家名傳一紙榜興管九衢花薦
聽諸侯樂來隨計吏車杏園拋曲處揮袖向風斜

何處深春好春深少婦家能偷新禁曲自剪入時花追
逐同遊伴平章貴價車從來不墮馬故遣髻鬟斜

何處深春好春深幼女家雙鬟梳頂髻兩面繡裙花妝

壞頻臨鏡身輕不占車鞦韆爭次第牽拽綵繩斜

何處深春好春深蘭若家當香收栢葉養蜜近梨花野
逕宜行樂遊人盡駐車菜園籬落短遙見桔槔斜

何處深春好春深老宿家小欄圍蕙草高架引藤花四
字香書印三乘壁畫車遲迴聽句偈雙樹晚陰斜

何處深春好春深種蒔家分畦十字水接樹兩般花櫛
比栽籬槿伊啞轉井車可憐高處望棋布不曾斜

何處深春好春深稚子家曾騎一竿竹偷折四隣花笑

擊羊皮鼓行牽犢領車中庭貪夜戲不覺玉繩斜

秋夕不寐寄樂天

洞戶夜簾卷華堂秋簟清螢飛過池影蛩思遠階聲老
枕知將雨高窻報欲明何人諳此景遠問白先生

冬日晨興寄樂天

庭樹曉禽動郡樓殘點聲燈挑紅燼落酒暖白先生髮
少嫌梳利顏衰恨鏡明獨吟誰應和須寄洛陽城

八月十五夜半雲開然後翫月因咏一時之景寄

呈樂天

半夜碧雲收中天素月流開城邀好客置酒賞新秋影
透衣香潤光凝歌黛愁斜暉猶可翫移宴上西樓

秋日書懷寄白賓客

州遠雄無益年高健亦衰興情逢酒在筋力上樓知蟬
噪芳意盡雁來愁望時商山紫芝客應不向秋悲

酬樂天初冬早寒見寄

乍起衣猶冷微吟帽半欹霜凝南至瓦難唱後園枝洛

水碧雲曉吳宮黃葉時
兩傳千里意書札不如詩

酬樂天閒卧見寄

散誕向陽眠將閒敵地仙
詩情茶助爽藥力酒能宣
風碎竹間日露明池底天
同年未同隱緣欠買山錢

閒坐憶樂天以詩問酒熟未

案頭開縹帙肘後檢青囊
唯有達生理應無治老方
減書存眼力省事養心王
君酒何時熟相攜入醉鄉

秋中暑退贈樂天

暑服宜秋著清琴入夜彈人情皆向菊風意欲推蘭歲
稔貪心泰天涼病體安相逢取次第却甚少年歡

初至長安

時自外郡
再授郎官

左遷凡二紀重見帝城春老大歸朝客平安出嶺人每
行經舊處却想似前身不改南山色其餘事事新

題淳于髡墓

生為齊贅壻死作楚先賢應以客鄉葬故臨官道邊寓
言本多興放意能合權我有一石酒置君墳樹前

送河南皇甫少尹赴絳州

祖帳臨周道前旌指晉城
午橋羣吏散亥市老人迎
詩酒同行樂分離始見情
從茲洛陽社吟咏欠書生

南中書來

君書問風俗此地接炎州
淫祀多青鬼居人少白頭
旅情偏在夜鄉思豈唯秋
每羨朝宗水門前盡日流

春日寄楊八唐州

淮西春草長淮水逶迤光
燕入新春路人耕舊戰場
可

憐行春守立馬看斜桑

半律

海陽湖別浩初師

近郭有殊境獨遊常鮮歡逢君駐緇錫觀白稱林巒湖
滿景方霽野香春未闌愛泉移席近聞石輟碁看風止
松猶韻花繁露未乾橋形出樹曲巖影落池寒別路千
峯外詩情暮雨端他年買山處似此則隳官

元和癸巳歲仲秋詔發江陵偏師問罪蠻徵後命
宣慰釋兵歸降凱旋之辰率爾成咏寄荆南嚴

司空

蠻水阻朝宗兵符下渚宮前籌得上策無戰已成功漢
使星飛入夷心草偃同歡謠開竹棧拜舞戢桑弓就日
知水釋投人念鳥窮網羅三面解章奏九門通卉服聯
操袂雕題盡鞠躬降幡秋練白驛騎晝塵紅火號休傳
警機橋罷亘空登山不見敵振旆自生風江遠煙波靜
軍回氣色雄佇看聞喜後金石賜元戎

武陵書懷五十韻

西漢開支郡南朝號城藩四封當列宿百雉俯清沉高
岸朝霞合驚湍急箭奔積陰春暗度將霽霧先昏俗尚
東皇祀謠傳義帝寃桃花迷隱跡棟葉慰忠魂戶算資
漁獵鄉豪恃子孫照山畚火動踏月俚歌喧擁楫舟為
市連薨竹覆軒披沙金粟見拾羽翠翹翻茗折滄溪秀
蘋生枉渚暄禽鳴格磔起魚戲唼喁繁沈約臺榭故李
衡墟落存隱侯臺木
奴洲並在湘靈悲鼓瑟泉客泣酬恩露變兼
葭浦星懸橘柚村虎咆空野震鼉作滿川渾鄰里皆遷

客兒童習左言炎天無冽井霜月見芳蓀清白家傳遠
詩書志所敦列科叨甲乙從宦出丘樊結友心多契馳
聲氣尚吞士安曾重賦元禮許登門草檄嫖姚幕巡兵
戍已屯築臺先自隗送客獨留髡遂結玉畿綬來觀衢
室尊鳶飛入鷹隼魚目儂璵璠曉燭羅馳道朝陽闕帝
闈皇正會夷夏月朔盛旗幡獨立當瑤闕傳歌步紫垣
按章清犴獄視祭潔蘋蘩御厯昌期遠傳家寶祚蕃繇
文光夏啓神教畏軒轅內禪因天性雄圖授化元繼明

懸日月出震統乾坤大孝三朝備洪恩九族惇百川宗
渤澥五嶽輔崑崙何幸逢休運傲班識至尊校緡資筦

權復土問山園

時以本官判度支鹽鐵等兼崇陵使判官

一失貴人意徒聞

太學論直廬辭錦帳遠守愧朱幡巢幕方猶燕搶榆尚
笑鯤遭迴過荆楚流落感涼溫旅望花無色愁心醉不
愔春江千里草暮雨一聲猿問卜安冥數看方理病源
帶賒衣改製塵濕劍成痕三秀悲中散二毛傷虎賁來
憂禦魑魅歸願牧雞豚就日秦京遠臨風楚奏煩南登

無灞岸旦夕上高原

和汴州令狐相公到鎮改月偶書所懷二十二韻

受服新梁苑和羹舊傅巖
援毫動星宿垂釣使韜鈴赫
奕三川至歡呼百姓瞻
綠油貔虎擁青紙鳳凰銜外壘
曾無警中廚亦罷監推誠
人自服去殺令逾嚴
赴客皆飾幡幡口盡鉗
為兄憐庾翼選堦得蕭咸
鬱屈咽喉地駢臻
水陸兼渡橋鳴紘憶入肆
颺雲帆端月當中氣
東風應遠占管絃
喧夜景燈燭掩寒蟾
酒每傾三雅書

能發百函詞人羞布鼓遠客獻貂襜歌榭白團扇舞筵
金縷衫旌旗遙一簇烏履近相攬花樹當朱閣晴河逼
翠簾映鏤窺艷艷隔袖見纖纖謝傅何由接桓伊定不
凡應憐郡齋老旦夕鑷霜髯

三月三日與樂天及河南李尹奉陪裴令公泛洛
禊飲各賦十二韻

洛下今修禊羣賢勝會稽盛筵陪玉鉉通籍盡金闈波
上神仙妓岸傍桃李蹊水嬉如鷺振歌響雜鶯啼歷覽

風光好沿洄意思迷棹歌能儷曲墨客競分題翠幄連
雲起香車向道齊人誇綾步障馬惜錦障泥塵暗宮墻
外霞明苑樹西舟形隨鷁轉橋影與虹低川色晴猶遠
鳥聲暮欲棲唯餘踏青伴待月魏王堤

酬樂天晚夏閒居欲相訪先以詩見貽

池榭堪臨泛脩然散鬱陶步因驅鶴緩吟為聽蟬高林
密添新竹枝低墜晚桃酒醅晴易熟藥圃夏頻薈老是
班行舊閒為鄉里豪經過更何處風景屬吾曹

酬樂天詠老見示

人誰不願老老去有誰憐身瘦帶頻減髮稀冠自偏廢
書緣惜眼多矣為隨年經事還諳事閱人如閱川細思
皆幸矣下此便翛然莫道桑榆晚傲霞尚滿天

酬樂天醉後狂吟十韻

來章有移家
唯醉和之句

散誕人間樂逍遙地上仙詩家登逸品釋氏悟真詮
制誥留臺閣歌詞入管絃處身于木雁任世變桑田吏隱
情兼遂儒玄道兩全八關齊適罷三雅興尤偏文墨中

年舊松筠晚歲堅魚書曾替代香火有因緣

陸法和云
與梁元帝

于空王寺佛前
訂香火因緣

欲向醉鄉去尤為色界牽好吹楊柳曲

為我舞金鈿

歷陽書事七十韻

并序

長慶四年八月余自夔州轉歷陽浮岷山觀洞

庭歷夏口涉潯陽而東友人崔敦詩罷丞相鎮

宛陵緘書來招曰必我覲而之藩不十日飲不

置子故余自池州道宛陵如其素敦詩出祖於

敬亭祠下由姑孰西渡江乃吾園也至則考圖

經參見事為之詩

一夕為湖地千年列郡名霸王迷路處亞父所封城漢
置東南尉梁分肘腋兵本吳風俗剽兼楚語音儋沸井

今無湧烏江舊有名土臺遊柱史石室隱彭鏗

老君適楚有臺

在馬彭鏗石室在含山縣

曹操祠猶在濡須塢未平海潮隨月大江

水應春生憶昨深山裏終朝看火耕魚書來北闕鷓首
下南荆雲雨巫山暗蕙蘭湘水清章華事已失鄂渚草

來迎廬

闕文
三字

出湓城粉堞明雁飛彭蠡暮鴉噪大

雷晴平野分風使恬和趁夜程貴池登陸峻春穀渡橋

鳴絡繹主人問悲歡故舊情幾年方一面卜晝便三更

助喜杯盤盛忘機笑語旬管清疑警鶴絃巧似嬌鶯熾

炭烘蹲獸華茵織鬪鯨回車飄霧雨急節墮瓊英歛黛

凝愁色舒鈿耀翠晶容華本南國妝束學西京日落方

收鼓天寒更炙笙促筵交履烏痛飲倒簪纓謔浪容優

孟嬌憐許智瓊蔽明添翠帝命燭拄金莖坐久羅衣皺

杯傾粉面駢興來從請曲意墮即飛觥令急重思改歡
馮醉盡呈詰朝還選勝來日又尋盟道別殷勤惜邀筵
次第爭唯聞嗟短景不復有餘醒衆散扃朱戶相攜話
素誠晤言猶疊疊殘漏自丁丁出祖千夫擁行廚五熟
烹離亭臨野水別思入哀箏接境人情洽方冬饌具精
中流為界道隔岸數飛甍沙浦王渾鎮滄洲謝眺閣望
夫人化石夢帝日環營半渡趨津吏緣堤簇郡毗塲黃
堆晚稻籬碧見冬青里社爭來獻壺漿各自擎鷓夷傾

謹時方久分憂政未成比瓊雖碌碌於鐵尚錚錚早忝
曹三署曾聞奏六英無能甘負弩不慎在提衡口語成
中遘毛衣阻上征時聞關利鈍智亦有聾盲昔愧山東
妙今慙海內兄後來登甲乙早已在蓬瀛心托秦明鏡
才非楚白珩齒衰親藥物宦薄傲公卿捧日皆元老宣
風盡大彭好今朝集使結束赴新正

送渾大夫赴豐州

鳳銜新詔降恩華又見旌旗出漢家故吏來辭辛屬國

精兵願逐李，輕車羶裘君。
長迎風馭錦，帶首豪踏雪。
衙其奈明年好春日，無人喚看牡丹花。

送周使君罷渝州歸郢州別墅

君思郢上吟歸去，故自渝南擲郡章。
野戍岸邊留畫舸，綠蘿陰下到山莊。
池荷雨後衣香起，庭草春深綬帶長。
只恐鳴騶催上道，不容待得晚菘嘗。

送浙江李僕射相公赴鎮

奉送至臨泉驛書禮
見徵拙詩時在汝州

建節東行是舊遊，歡聲喜氣滿吳州。
郡人重得王丞相

童子爭迎郭細侯
詔下初辭温室樹
夢中先到景陽樓
自憐不識平津閣
遠望旌旗汝水頭

奉送戶部李侍郎自河南尹再除本官歸闕

昔年內署振雄詞
今日東都結去思
宮女猶傳洞簫賦
國人先詠袞衣詩
華星却復文昌位
別鶴重歸太乙池
想到金閨待通籍
一時驚喜見風儀

送蘄州李郎中赴任

楚門蘄水路非賒
東望雲山日夕佳
薤藥照人呈夏簟

松花滿盃試新茶樓中飲興因明月江上詩情為晚霞
北地交情長引領早將玄鬢到京華

重送浙西李相公頃廉問江南已經七載後歷滑
臺劍南兩鎮遂入相今復領舊地新加旌旄

江北萬人看玉節江南千騎引金鏡鳳從池上遊滄海
鶴到遼東識舊巢城下清波含百谷窓中遠岫列三茅
碧雞白馬回翔久却憶朱方是樂郊

送分司陳郎中祇召直史館重修三聖寶籙

蟬鳴宮樹引行車言自成周赴玉除遠取南朝貴公子
重修東觀帝王書常時載筆窺金匱暇日登樓到石渠
若問舊人劉子政如今頭白在商於

廣宣上人寄在蜀與韋令公唱和詩卷因以令公
手札答詩示之

碧雲佳句久傳芳曾向成都住草堂振錫常過長者宅
披衣猶帶令公香一時風景添詩思八部人天入道場
若許相期同結社吾家本自有柴桑

贈日本僧智藏

浮杯萬里過滄溟
遍禮名山適性靈
深夜降龍潭水黑
新秋放鶴野田青
身無彼我那懷土
心會真如不讀經
為問中華學道者
幾人雄猛得寧馨

西塞山懷古

王濬樓船下益州
金陵王氣黯然收
千尋鐵鎖沈江底
一片降幡出石頭
人世幾回傷往事
山形依舊枕寒流
而今四海為家日
故壘蕭蕭蘆荻秋

長慶中元微之夢
得韋楚客同會樂

天舍論南朝興廢各賦金陵懷古詩劉滿引一杯飲已
即成白公覽詩曰四人探驪龍子先獲珠所餘鱗爪何
用耶于
是罷唱

漢壽城春望

古荊州刺史治亭下有
子胥廟兼楚王故墳

漢壽城邊野草春
荒祠古墓對荆榛
田中牧豎燒芻狗
陌上行人看石麟
華表半空經霹靂
碑文纔見滿埃塵
不知何日東瀛變
此地還成要路津

荊州道懷古

南國山川舊帝畿
宋臺梁館尚依稀
馬嘶古樹行人歇

麥秀空城野雉飛
風吹落葉填宮井
火入荒陵化寶衣
徒使詞人庾
開府咸陽終日苦思歸

松滋渡望峽中

渡頭輕雨灑寒梅
雲際溶溶雪水來
夢渚草長迷楚望
夷陵土黑有秦灰
巴人淚應猿聲落
蜀客船從鳥道回
十二碧峯何處所
永安宮外是荒臺

覽董評事思歸之什因以詩贈

幾年油幕佐征東
却泛滄浪狎釣童
欹枕醉眠成戲蝶

抱琴閒望送歸鴻
文儒自襲膠西相
倚杖能齊塞上翁
更說扁舟動鄉思
青菰已熟奈秋風

寄楊八壽州

風獵紅旗入壽春
滿城歌舞向朱輪
八公山下清淮水
千騎塵中白面人
桂嶺雨餘多鶴跡
茗園晴望似龍鱗
聖朝方用敢言者
次第應須舊諫臣

贈東嶽張鍊師

東嶽真人張鍊師
高情雅淡世間稀
堪為烈女書青簡

久事元君住翠微，金縷機中拋錦字。
玉清壇上著霓衣，雲衢不要吹簫伴。
只擬乘鸞獨自飛。

祕書崔少監見示墜馬長句因而和之

麟臺少監舊仙郎，洛水橋邊墜馬傷。
塵汗腰間青襪綬，風飄掌上紫遊韁。
上車著作應來問，折臂三公定送方。
猶賴德全如醉者，不妨吟咏入篇章。

秋日題竇員外崇德里新居

長愛街西風景閒，到君居處暫開顏。
清光門外一渠水

秋色墻頭數點山
疎種碧松通月朗
多栽紅藥待春還
莫言堆案無餘地
認得詩人在此間

酬淮南廖參謀秋夕見過之作

揚州從事夜相尋
無限新詩月下吟
初服已驚玄髮長
高情猶向白雲深
語餘時舉一杯酒
坐久方聞數處砧
不逐繁華訪閒散
知君擺落俗人心

題王郎中宣義里新居

愛君新買街西宅
客到如遊鄠杜間
雨後退朝貪種樹

申時出省趨看山門前巷陌三條近
墻內池亭萬境閒
見擬移居作隣里不論時日請開關

酬朗州崔員外與任十四兄侍御同過鄙人舊居

見懷之什時守吳郡

昔日居鄰招屈亭楓林橘樹鷓鴣聲
一辭御苑青門去
十見蠻江白芷生自此曾沾宣室召
如今又守闔閭城
何人萬里能相憶同舍仙郎與外兄

劉駙馬水亭避暑

千竿竹翠數蓮紅
水閣虛涼玉簾空
琥珀瓊紅疑瀉酒
水晶簾密更通風
賜水滿盃沉朱實
法饌盈盤覆碧籠
盡日逍遙避煩暑
再三珍重主人翁

廟庭偃松詩

并序

侍中後閣前有小松不特立而偃丞相晉公為
賦詩美其猶龍蛇然植於高檐喬木間上嵌旁
軋盤蹙傾亞似不得天和者公以遂物性為意
乃加憐焉命畚土以壯其趾使無敬索綯以牽

其榦使不仆盥漱之餘以潤之顧盼之輝以照
之發於人心感召和氣無復大闕坐能敷舒擲
之跽感化為竒古故雖衰丈而有偃號焉予嘗
詣閣白事公為道所以且示以詩竊感嘉木之
逢時斐然成咏

勢軋枝偏根已危高情一見與扶持忽從顛顛有生意
却為離披無俗姿影入巖廊行樂處韻含天籟宿齋時
謝公莫道東山去待取成陰滿鳳池

感呂衡州時予方謫居

一夜霜風凋玉芝，蒼生望絕士林悲。
空懷濟世安人畧，不見男婚女嫁時。
遺草一函歸大史，孤墳三尺近要離。
朔方徙歲行當滿，欲為君刊第二碑。

夔州竇員外使君見示悼妓詩，顧余嘗識之，命同作。

前年曾見兩鬢時，今日驚吟悼妓詩。
鳳管學成知有籍，龍媒欲換歎無期。
空廊月照常行地，後苑花開舊折枝。

寂寞魚山青草裏何人更立智瓊祠

竇夔州見寄寒食日憶故姬小紅吹笙因和之

鸞笙窈渺管參差清韻初調衆樂隨幽院妝成花下弄
高樓月好夜間吹忽驚暮雨飄零盡唯有朝雲夢想期
聞道今年寒食日東山舊路獨行遲

白舍人自杭州寄新詩有柳色春藏蘇小家之句
因而戲酬兼寄浙東元相公

錢塘山水有奇聲暫謫仙官領百城女妓還聞名小小

使君誰許喚卿卿
鼇驚震海風雷起
蜃闕噓天樓閣成
莫道騷人在三楚
文星今向斗牛明

酬樂天揚州初逢席上見贈

巴山楚水淒涼地
二十二年棄置身
懷舊空吟聞遠賦
到鄉翻似爛柯人
沉舟側畔千帆過
病樹前頭萬木春
今日聽君歌一曲
暫憑杯酒長精神

同白二十二贈王山人

愛名之世忘名客
多事之時無事身
古老相傳見來久

歲年雖變貌常新
飛章上達三清路
受籙平交五嶽神
笑聽鼔鼔朝暮鼓
只能催得市朝人

答樂天戲贈

才子聲名白侍郎
風流雖老尚難當
詩情逸似陶彭澤
齋日多如周太常
矻矻將心求淨法
時時偷眼看春光
知君技癢思歡讌
欲倩天魔破道場

同樂天送令狐相公赴東畱守

自戶部
尚書拜

尚書劍履出明光
居守旌旗赴洛陽
世上功名兼將相

人間聲價是文章，衙門曉闕分天仗。賓幕初開辟省郎。

從發坡頭向東望，春風處處有甘棠。

自華陵至河南皆故林也

刑部白侍郎謝病長告改賓客分司以詩贈別

鼎食華軒到眼前，拂衣高坐豈徒然。九霄路上辭朝客，
四皓叢中作少年。他日卧龍終得雨，今朝放鶴且冲天。
洛陽舊有衡茅在，亦擬抽身伴地仙。

赴蘇州酬別樂天

吳郡魚書下紫宸，長安廐吏送朱輪。二南風化承遺愛，

八詠聲名躡後塵梁氏夫妻為寄客陸家兄弟是州民
江城春日追隨處共憶東歸舊主人

福先寺雪中酬別樂天

龍門賓客會龍宮東去旌旗駐上東二八笙歌雲幕下
三千世界雪花中離堂未暗排紅燭別曲含淒颺曉風
才子從今一分散便將詩詠向吳儂

酬樂天見寄

元君後輩先零落崔相同年不少畱華屋坐來能幾日

夜臺歸去便千秋背時猶自居三品

三川吳
郎品同

得老終須

卜一丘

投老之日願
與樂天為隣

若使吾徒還早達亦應簫鼓入松

楸

河南白尹有喜崔賓客歸洛兼見懷長句因而繼

和

幾年侍從作名臣却向青雲索得身朝士忽為方外士
主人仍是眼中人雙鸞遊處天京好五馬行時海嶠春
遙羨光陰不虛擲肯令絲竹暫生塵

和楊師皋給事傷小姬英英

見學胡琴見藝成今朝追想幾傷情
撚絃花下呈新曲
放撥燈前謝改名
但是好花皆易落
從來尤物不長生
鸞臺夜直衣衾冷
雲雨無因入禁城

題于家公主舊宅

樹滿荒臺水滿池
簫聲一絕草蟲悲
鄰家猶學宮人髻
園客爭偷御果枝
馬埒蓬蒿藏狡兔
鳳棲煙雨笑愁鷗
何郎獨在無恩澤
不似當初傅粉時

樂天見示傷微之敦詩晦叔三君子皆有深分因
成是詩以寄

吟君歎逝雙絕句使我傷懷奏短歌世上空驚故人少
集中唯覺祭文多芳林新葉催陳葉流水前波讓後波
萬古到今同此恨聞琴淚盡欲如何

和樂天柘枝

柘枝本出楚王家玉面添嬌舞態奢鬆鬢改梳盤鳳髻
新衫別織鬪雞紗鼓催殘拍腰身軟汗透羅衣雨點花

畫筵曲罷辭歸去便隨王母上煙霞

和樂天齋戒月滿夜對道場偶懷詠

常修清靜去繁華人識王城長者家
案上香煙鋪貝葉佛前燈焰透蓮花
持齋已滿招閒客理曲先聞命小娃
明日若過方丈室還因問為法來耶

酬樂天齋滿日裴令公置讌席上戲贈

一月道場齋戒滿今朝華幄管絃迎
銜杯本自多狂態事佛無妨有佞名
酒力半酣愁已散文鋒未透老猶爭

平陽不獨容賓醉聽取喧呼吏舍聲

酬樂天偶題酒甕見寄

從君勇斷拋名後世路榮枯見幾回
門外紅塵人自走甕頭清酒我初開
三冬書任胸中有萬戶侯須骨上來
何幸相招同醉處洛陽城裏好池臺

和牛相公遊南莊醉後寓言戲贈樂天兼見示

城外園林初夏天就中野趣在西偏
薔薇亂發多臨水鵝鷺雙遊不避船
水底遠山雲似雪橋邊平岸草如烟

白家唯有杯觴興欲把頭盤打少年

樂天以愚相訪沽酒致歡用七言聊以奉答

少年曾醉酒旗下同輩黃衣領亦黃
跼踏青雲尋入仕
蕭條白髮且飛觴
今徵古事歡生雅
客喚閒人興任狂
猶勝獨居荒草院
蟬聲聽盡到寒螿

張郎中籍遠寄長句開緘之日已及新秋因舉目

前仰酬高韻

南宮詞客寄新篇清似湘靈促柱絃
京邑舊遊勞夢想

歷陽秋色正澄鮮
雲銜日脚成山雨
風駕潮頭入渚田
對此獨吟還獨酌
知音不見思蒼然

懷妓

玉釵重合兩無緣
魚在深潭鶴在天
得意紫鸞休舞鏡
能言青鳥罷銜牋
金盆已覆難收水
玉軫長拋不續絃
若向蘼蕪山下過
遙將紅淚灑窮泉

鸞飛遠樹棲何處
鳳得新巢想稱心
紅壁尚留香漠漠
碧雲初斷信沉沉
情知點污投泥土
猶自經營買笑金

從此山頭似人石丈夫形狀淚痕深

人從何處更尋看雖是生離死一般買笑樹邊花已老
畫眉窓下月猶殘雲藏巫峽音容斷路隔星橋過往難
莫怪詩成無淚滴盡傾東海也須乾

三山不見海沉沉豈有仙蹤更可尋青鳥去時雲路斷
姮娥歸處月宮深紗窓遙想春相憶書幌誰憐夜獨吟
料得夜來天上鏡只應偏照兩人心

酬浙東李侍郎越州春晚即事長句

越中藹藹繁華地
秦望峯前禹穴西
湖草初生邊雁去
山花半謝杜鵑啼
青油畫卷臨高閣
紅旆晴翻繞古堤
明日漢庭徵舊德
老人爭出若耶溪

再授連州至衡陽酬柳柳州贈別

去國十年同赴召
渡江千里又分歧
重臨事異黃丞相
三黜名慙柳士師
歸目併隨回雁盡
愁腸正遇斷猿時
桂江東過連山下
相望長吟有所思

和樂天送鶴上裴相公別鶴之作

昨日看成送鶴詩高籠提出白雲司朱門乍入應迷路
玉樹容棲莫揀枝雙舞庭中花落處數聲池上月明時
三山碧海不歸去且向人間呈羽儀

巫山神女廟

巫山十二鬱蒼蒼片石亭亭號女郎曉霧乍開疑卷幔
山花欲謝似殘妝星河好夜聞清珮雲雨歸時帶異香
何事神仙九天上人間來就楚襄王

柳絮

飄颻南陌起東隣
漠漠濛濛好度春花巷
暖隨輕舞蝶
玉樓晴拂艷妝人
縈迴謝女題詩筆
點綴陶公漉酒巾
何處好風偏似雪
隋河隄上古江津

送曹處士歸越中舊隱詩

行盡瀟湘萬里餘
少逢知己憶吾廬
數間茅屋閒臨水
一盞秋燈夜讀書
地遠何當隨計吏
策成終自詣公車
剡中若問連州事
惟有千山畫不如

自江陵沿流道中

三千三百西江水自古如今要路津
月下歌謠有漁父
風天氣色屬商人沙村好處多
逢寺山葉紅時却勝春
行到南朝征戰地古來名將盡為神

魚腹江中

扁舟盡室貧相逐白髮藏冠鑷
更加遠水自澄終日綠
晴林長落過春花客情浩蕩逢鄉語
詩意流連重物華
風檣好住貪程去斜日青帘背酒家

御定全唐詩錄卷三十九